

Objavljeno	10. 12. 2006. 14:14:14
Datum	13 DEC 2006
Ime	Lojka

PRIMLJENO
d. 13. 12. 2006
20. godine
SUD BIH SARAJEVO
Ovlašteni tužilac

BOSNA I HERCEGOVINA  
TUŽILAŠTVO-TUŽITELJSTVO  
BOSNE I HERCEGOVINE  
SARAJEVO

Broj: KT-RZ-132/06

Sarajevo, 13. 12. 2006. godine

SUD BOSNE I HERCEGOVINE  
BROJ: X-KRN-06/236

Na osnovu člana 35. stav 2. tačka h), člana 226. stav 1. i člana 227. Krivičnog zakona Bosne i Hercegovine (ZKP), podižem

### OPTUŽNICU

#### PROTIV:

- BOŽIĆ Zdravka**, rođenog 03.05.1964. godine u Lašvi, opština Zenica, sin Trive i Milice, rođene Bencun, Srbin po nacionalnosti, neoženjen, završio srednju školu, slabog materijalnog stanja, služio vojsku 1992. godine, osuđivan za imigracijsku prevaru iz Poglavlja 18 Zakona Sjedinjenih Država, paragraf 1546 (a) i 3238, te krivokletstvo iz Poglavlja 18 Zakona Sjedinjenih Država, paragraf 1621 (2) od strane Okružnog suda Sjedinjenih Država okruga Arizona, CR 04-00430-001-PIX-EHC, od 30.03.2005. godine, osuđen na dvanaest (12) mjeseci zatvorske kazne, po kojoj se svaka osuda služi istovremeno, a zatim je deportovan iz Sjedinjenih Američkih Država i stigao u BiH 30.06.2006. godine, trenutno u pritvoru u skladu sa Rješenjem Suda BiH X-KRN 06-236 od 27.09.2006. godine do 28.12.2006. godine.
- BLAGOJEVIĆ Mladena**, rođenog 22.03.1971. godine u Bratuncu, sin Radisava i Milosave Obaškić, oženjen, pismen, Srbin po nacionalnosti, porijeklom iz Repovca, državljanin BiH, JMB 2203971181376, br. pasoša BiH 4752137, služio vojsku SFRJ u Beogradu od 1990. god. do 1991. god. prethodno osuđivan za imigracijsku prevaru iz Poglavlja 18 Zakona Sjedinjenih Država, paragraf 1546 (a) od strane Okružnog suda Sjedinjenih Država okruga Arizona, CR 05-00674-001-PHX-DGC, od 20.09.2006. godine, osuđen na 12 mjeseci zatvora, kazna suspendovana zbog deportacije u BiH, stigao u BiH 15.11. 2006. godine; trenutno u pritvoru u skladu sa Rješenjem Suda BiH, X-KRN 06-236 od 17.11.2006. godine do 15.12.2006. godine u 16:30 sati.



3. **ZARIĆ Željka**, rođenog 03.10. 1973. godine u Slapašnici, opština Bratunac, sin Radojka i Milenije Jokić, radnik, nezaposlen, državljanin BiH, Srbin po nacionalnosti, JMB br. 0310973181377, broj lične karte 06F1B1797, izdata od strane MUP-a RS, Bratunac, živi u ulici Svetog Save bb, Bratunac, nije poznato da li je ranije osuđivan; trenutno u pritvoru u skladu sa Rješenjem Suda BiH, X-KRN 06-236 od 07.12.2006. god. do 05.01.2007. god.
4. **ŽIVANOVIĆ Zorana**, zvanog „Snajper“, rođenog 29.08.1972. god. u Ljuboviji, sin Jevte i Milosave Vuksić, automehaničar, nezaposlen, državljanin BiH, Srbin po nacionalnosti, živi u Slapašnici, opština Bratunac, JMB: 2908172774536, br. lične karte 05FTA9176, izdata od strane MUP-a RS, Bratunac, nije poznato da li je ranije osuđivan; trenutno u pritvoru u skladu sa Rješenjem Suda BiH X-KRN 06-236 od 09.12.2006. god. do 08.01.2007. godine.

#### ŠTO SU:

Između 11. i 18.07. 1995. godine na području opštine Bratunac, Zvornik i Srebrenica, u toku oružanog sukoba u Republici Bosni i Hercegovini u okviru kojeg su vojska i policija Republike Srpske usmjerile širok i sistematski napad na civilno bošnjačko stanovništvo u „zaštićenoj zoni“ UN – enklave Srebrenica, napad koji je bio u skladu sa državnim ili organizacionom politikom da se izvrši takav napad i u cilju sprovođenja te politike, čija posljedica je bila smrt 8000 civila, muškaraca bošnjačke nacionalnosti koji su ubijeni u okviru oportunističkih pogubljenja po kratkom postupku, te nasilno premještanje oko 40.000 civila bošnjačke nacionalnosti iz enklave Srebrenica,

optuženi **BOŽIĆ Zdravko**, **BLAGOJEVIĆ Mladen**, **ZARIĆ Željko** i **ŽIVANOVIĆ Zoran**, kao vojni policajci i pripadnici jedinice vojne policije Bratunačke lake pješadijske brigade VRS, u trenutku kada su počeli pritvarati zarobljenike preuzeli su sve dužnosti i odgovornosti prema međunarodnom pravu koje se odnose na postupanje prema zarobljenicima za vrijeme oružanog sukoba, pri čemu ove odgovornosti prvenstveno podrazumijevaju obavezu da se u svakom momentu prema pritvorenicima postupa čovječno, bez diskriminacije na etničkoj osnovi;

svojim postupanjem i propustima planirali su, naređivali, poticali, počinili, pomagali i podržavali počinjenje krivičnih djela i propusta, znajući da su njihovi postupci i propusti dio širokog i sistematskog napada na civilno stanovništvo, čineći to s namjerom sa diskriminaciju Bošnjake na političkoj, rasnoj, nacionalnoj, etničkoj, kulturnoj i religijskoj osnovi; i kao svjesni učesnici udruženog zločinačkog poduhvata zajedno sa drugim pripadnicima vojske i Ministarstva unutrašnjih poslova Republike Srpske uključujući pripadnike jedinice Vojne policije Bratunačke lake pješadijske brigade sa ciljem da zarobe, pritvore i nasilno premjeste civilno bošnjačko stanovništvo iz enklave Srebrenica, pri čemu navedena krivična djela i propusti predstavljaju djela učešća u zajedničkom zločinačkom poduhvatu, kako je naprijed opisano; dakle, svi optuženi snose individualnu odgovornost za vlastita djela i propuste, kao i za djela i propuste drugih,



uključujući i ona koja predstavljaju prirodne i predvidive posljedice zajedničkog cilja ili plana i operacije:

**BOŽIĆ Zdravko, BLAGOJEVIĆ Mladen, ZARIĆ Željko i ŽIVANOVIĆ Zoran zajedno:**

1. U noći između 13. i 14.07.1995. godine, u (Osnovnoj) školi Vuk Karadžić (sada poznatoj pod nazivom Škola Branko Radičević) u Bratuncu, opština Bratunac, **BOŽIĆ Zdravko, BLAGOJEVIĆ Mladen, ZARIĆ Željko i ŽIVANOVIĆ Zoran** su stražarili, vršili kontrolu ili obezbjeđivali privremene pritvorske prostorije u i oko škole, koristeći silu i prijetnje da će upotrijebiti silu kako bi držali u pritvoru 2.000 do 3.000 nenaoružanih civila (muškaraca) Bošnjaka, unutar škole i u školskim objektima, a radi se o pritvorenicima koji su bili zarobljeni iz kolone muškaraca Bošnjaka koja je bježala pred napadom na srebreničku enklavu, ili koji su bili odvojeni u Potočarima od žena i djece bošnjačke nacionalnosti, te prevezeni u Bratunac; čime su im spriječili slobodu kretanja, te ih lišili slobode.
2. U noći između 13. i 14.07.1995. godine, u (Osnovnoj) školi "Vuk Karadžić" (sada poznatoj pod nazivom Škola "Branko Radičević") u Bratuncu, opština Bratunac, dok vršili obezbjeđenje škole i područja oko škole, **BOŽIĆ Zdravko, BLAGOJEVIĆ Mladen, ZARIĆ Željko i ŽIVANOVIĆ Zoran** su učestvovali u maltretiranju, premlaćivanju, okrutnom postupanju i radnjama koje izazivaju strah koje su počinili drugi pripadnici VRS i MUP-a RS snaga bosanskih Srba koji su pritvorili 2.000 do 3.000 nenaoružanih civila, muškaraca bošnjačke nacionalnosti u školi i bližoj okolini.
3. Dana 14.07.1995. godine, u (Osnovnoj) školi "Vuk Karadžić" (sada poznatoj pod nazivom "Branko Radičević") u Bratuncu, opština Bratunac, **BOŽIĆ Zdravko, BLAGOJEVIĆ Mladen, ZARIĆ Željko i ŽIVANOVIĆ Zoran**, učestvovali su u obezbjeđenju škole sa namjerom da spriječe bijeg nezakonito pritvorenih civila Bošnjaka muškaraca, tako što su stražarili van i oko zgrade, kada su neidentifikovani pripadnici MUP-a RS, s namjerom da ubiju, pucali iz svojih pištolja na pet (5) neidentifikovanih pritvorenih civila Bošnjaka muškaraca koji su pokušali pobjeći iz pritvora u školskoj zgradi, čime su iste lišili života.
4. Dana 14.07.1995. godine, u (Osnovnoj) školi "Vuk Karadžić" (sada poznatoj pod nazivom "Branko Radičević") u Bratuncu, opština Bratunac, **BOŽIĆ Zdravko, BLAGOJEVIĆ Mladen, ZARIĆ Željko i ŽIVANOVIĆ Zoran**, učestvovali su u obezbjeđenju škole sa namjerom da spriječe bijeg nezakonito pritvorenih civila, Bošnjaka muškaraca, tako što su stražarili van i oko zgrade kada su neidentifikovani pripadnici VRS pucali iz automatskog oružja i nezakonito ubili jednog (1) neidentifikovanog pritvorenog civila, muškarca bošnjačke nacionalnosti, koji je pokušao pobjeći iz pritvora u zgradi škole, te ga tom prilikom lišili života.
5. Dana 14.07.1995. godine u Bratuncu, opština Bratunac, **BOŽIĆ Zdravko, BLAGOJEVIĆ Mladen, ZARIĆ Željko i ŽIVANOVIĆ Zoran** obezbjeđivali su prostor oko (osnovne) škole "Vuk Karadžić" (sada poznate pod nazivom Škola "Branko



Radičević"), dok su muškarci bošnjačke nacionalnosti bili prisiljeni od strane pripadnika VRS i MUP-a RS da napuste zgradu škole, a **ŽIVANOVIĆ Zoran**, čekajući prijevoz i znajući da će ovi civili, muškarci bošnjačke nacionalnosti, biti prevezeni do drugih prostorija koje su služile kao privremeni pritvor, u ili oko opštine Zvornik, tj. van srebreničke enklave, a zatim su obezbijedili pratnju za prijevoz, te iskrcali navedena lica na mjestu predviđenom za pritvor, pri čemu su učestvovali u prisilnom premještanju pritvorenika.

6. Dana 14.07.1995. godine, u školi Grbavci, u Orahovcu, opština Zvornik, **BOŽIĆ Zdravko**, **BLAGOJEVIĆ Mladen**, **ZARIĆ Željko** i **ŽIVANOVIĆ Zoran** su, nakon što su obezbijedili pratnju za prijevoz pritvorenika Bošnjaka iz Bratunca, stražarili, vršili kontrolu i obezbjeđivali školsku sašu za fiskulturu i kompleks školskog igrališta gdje se nalazilo između 1.000 i 2.500 nenaoružanih civila, muškaraca bošnjačke nacionalnosti, koji su tu dovezeni iz privremenih pritvorskih prostorija i mjesta u Bratuncu dana 14.07.1995. godine ili približno tog datuma, čime su spriječili slobodu kretanja navedenih lica i iste lišili slobode.

7. Dana 14.07.1995. godine, u školi Grbavci, u Orahovcu, opština Zvornik, **BOŽIĆ Zdravko**, **BLAGOJEVIĆ Mladen**, **ZARIĆ Željko** i **ŽIVANOVIĆ Zoran** su učestvovali u maltretiranju, premlaćivanju, okrutnom postupanju i radnjama koje izazivaju strah, koje su počinili drugi pripadnici VRS i MUP-a RS snaga bosanskih Srba koji su pritvorili 1.000 do 2.500 nenaoružanih civila, muškaraca bošnjačke nacionalnosti u školi i bližoj okolini.

#### **BOŽIĆ Zdravko, BLAGOJEVIĆ Mladen i ZARIĆ Željko zajedno:**

8. U noći između 13. i 14.07.1995. godine, u (Osnovnoj) školi "Vuk Karadžić" (sada poznatoj kao Škola "Branko Radičević" u Bratuncu, opština Bratunac, jedan (1) neidentifikovani civil, muškarac bošnjačke nacionalnosti, koji je bio pritvoren u školi, pojavio se na prozoru prvog sprata, a **ZARIĆ Željko** je pucao na tog jednog (1) neidentifikovanog civila Bošnjaka muškarca sa broving mitraljezom montiranim na pingaueru, koji je pripadao jedinici Vojne policije Bratunacke lake pješadijske brigade i bio parkiran ispred škole, pri čemu je navedenog lišio života, dok je **BLAGOJEVIĆ Mladen** pucao na istu osobu iz svoje automatske puške, a **BOŽIĆ Zdravko** je stajao u blizini sa svojom automatskom puškom spremnom za paljbu i uperenom ka školi.

#### **BOŽIĆ Zdravko i BLAGOJEVIĆ Mladen zajedno:**

9. U noći između 13. i 14.07.1995. godine, u (Osnovnoj) školi Vuk Karadžić (sada poznatoj kao Škola "Branko Radičević") u Bratuncu, opština Bratunac, neidentifikovani vojnici VRS prisilno su odveli najmanje pet (5) nenaoružanih civila Bošnjaka muškaraca, iz škole gdje su isti bili pritvoreni od strane snaga bosanskih Srba, te ih poredali kod škole u red za strijeljanje, pri čemu su **BOŽIĆ Zdravko**, **BLAGOJEVIĆ Mladen** i do šest (6) drugih (neidentifikovanih) pripadnika VRS pucali i ubili ove (neidentifikovane) muškarce Bošnjačke nacionalnosti iz automatskog naoružanja, čime su iste lišili života.



**BLAGOJEVIĆ Mladen i ZARIĆ Željko zajedno:**

10. Dana 14.07.1995. godine, u školi "Grbaveci", u Orahovcu, opština Zvornik, dok su **BLAGOJEVIĆ Mladen** i **ZARIĆ Željko** stražarili, vršili kontrolu, obezbjeđivali školsku fiskulturnu salu i kompleks školskog igrališta gdje se nalazilo između 1.000 i 2.500 nenaoružanih civila, muškaraca bošnjačke nacionalnosti koji su to dovezeni iz privremenih pritvorskih prostorija i mjesta u Bratuncu otprilike 14.07.1995. godine, te spriječili slobodu kretanja navedenih lica i iste lišili slobode, tačnije, **ZARIĆ Željko** i **BLAGOJEVIĆ Mladen** koristili su situ kako bi prisilili pritvorenike da ostanu u školskoj sali za fiskulturnu, gdje je prilikom upotrebe sile ispaljen hitac iz automatskog oružja koje je imao **ZARIĆ Željko** ili **BLAGOJEVIĆ Mladen**, što je uzrokovalo ranjavanje osobe koja je stajala sa strane.

**ZARIĆ Željko i ŽIVANOVIĆ Zoran zajedno:**

11. U noći između 13. i 14.07.1995.godine, u (Osnovnoj) školi "Vuk Karadžić" (sada poznatoj pod nazivom "Branko Radičević") u Bratuncu, opština Bratunac, gdje je u školi i neposrednoj okolini škole bilo pritvoreno između 2.000 i 3.000 muškaraca, **ZARIĆ Željko** i **ŽIVANOVIĆ Zoran** su ušli u zgradu škole gdje su bili pritvoreni civili, muškarci bošnjačke nacionalnosti, i pucali iz svog automatskog oružja na pritvorenike.

12. Dana 14.07.1995. godine, u školi "Grbaveci", u Orahovcu, opština Zvornik, **ZARIĆ Željko** i **ŽIVANOVIĆ Zoran** su izdvojili tri (3) nenaoružana civila, muškarca bošnjačke nacionalnosti iz grupe ljudi koji su bili pritvoreni u školi Grbaveci i u neposrednoj blizini, te ih natjerali da odu na posebno mjesto, a zatim pucali na ta tri (3) neidentifikovana Bošnjaka muškarca iz svog automatskog oružja, čime su iste lišili života.

**BLAGOJEVIĆ Mladen:**

13. U noći između 13. i 14. 07.1995. godine, u (Osnovnoj) školi "Vuk Karadžić" (sada poznatoj pod nazivom Škola "Branko Radičević") u Bratuncu, Opština Bratunac, **BLAGOJEVIĆ Mladen** je, znajući da su u školi pritvoreni nenaoružani civili, muškarci bošnjačke nacionalnosti, otvorio vatru iz brovinga montiranog na pingaueru koji je pripadao jedinici Vojne policije Bratunačke lake pješadijske brigade i bio parkiran ispred škole, na pritvorenike u zgradi škole u namjeri da prema njima postupa okrutno i brutalno, te stvori strah među njima.

**ŽIVANOVIĆ Zoran:**

14. Dana 12. i 13.07.1995. godine u Potočarima, **ŽIVANOVIĆ Zoran** je učestvovao u organizovanom, nečovječnom i agresivnom postupku odvajanja muškaraca bošnjačke nacionalnosti od žena i djece bošnjačke nacionalnosti, te je upotrebom sile i pod prijetnjom upotrebe sile natjerao žene i djecu bošnjačke nacionalnosti da uđu u autobuse, znajući da će isti biti prebačeni izvan enklave Srebrenica na teritorij pod kontrolom bošnjačkih snaga.



**Dakle**, u toku oružanog sukoba i u sklopu širokog i sistematskog napada na civilno stanovništvo, napada koji je bio u skladu sa državnom i organizacionom politikom da se izvrši takav napad i u cilju sprovođenja te politike, znajući da su njihove radnje i nečinjenja dio jednog takvog napada, te znajući da učestvuju u njemu, **svi optuženi** su, kao vojni policajci i pripadnici jedinice Vojne policije Bratunačke lake pješadijske brigade VRS planirali, naređivali, poticali, pomagali i podržavali počinjenje krivičnih djela i propusta opisanih naprijed, a to su činili kao svjesni učesnici udruženog zločinačkog poduhvata sa drugima, kako je opisano naprijed: te su cijelo vrijeme djelovali, ili propustili da djeluju, u namjeri da diskriminišu Bošnjake na političkoj, rasnoj, nacionalnoj, etničkoj, kulturnoj i vjerskoj osnovi radi progona bošnjačkog stanovništva ubijanjem, prisilnim preseljenjem civila, zatvaranjem i nečovječnim postupanjem, zbog njihove pripadnosti grupi ili kolektivitetu Bošnjaka.

**ČIME SU:**

**BOŽIĆ Zdravko, BLAGOJEVIĆ Mladen, ZARIĆ Željko i ŽIVANOVIĆ Zoran** počinili krivično djelo **zločin protiv čovječnosti, progon** iz člana 172. st.1.tačka b) Krivičnog zakona Bosne i Hercegovine u vezi sa tačkom a) lišenje druge osobe života (ubistvo), d) **prisilno preseljenje stanovništva**, e) **zatvaranje** ili drugo ozbiljno lišavanje fizičke slobode kršenjem osnovnih pravila međunarodnog prava i k) **nečovječna djela** slične prirode učinjena u namjeri nanošenja velike patnje i ozbiljnih fizičkih i psihičkih povreda, a u vezi sa članom 21., 29. i 180. stav 1. Krivičnog zakona Bosne i Hercegovine.

